

汪子中詮

中詮序

新安後學畢懋康孟彥撰

昔徐幹著中論王通著中說幹
詞人之流在建安七子中獨為
澹素有箕穎之操而于道未必
有所窺通教授河汾以道術自

命著書擬經効顰唐突來六籍
奴婢之嘲此未可輕以中之一
字許之者夫中之為義闡自唐
虞歷禹湯文武周公孔子而未
有以易也原于帝降介在危微
擯神明以定模通古今以開類

高者下之卑者舉之饒者取之
罄者與之見而知之者智也視
而愛之者仁也斷而決之者勇
也能以偶物者通也無所繫轅
者時也圓方相研剛柔相平窮
變通久流止無定是以凡物操

之其中則足以無隅操之其隅
則不足以無中宣尼嘆其至德
子思歸以大本皆是物也倚之
則為朱翟執之則為子莫中豈
可以襲取為哉吾郡大司徒汪
登源先生潛心斯道雖以年歲

力學力行稱紫陽墨守著述甚
富而中詮一書尤其以心得為
名理者也其精以闡發性命次
則杼軸經濟其緒好旁及千古
上下六合內外本地風光絕無
依傍六經詎我家語六經以此

詮中其十六字之羽翼而鄒魯
漢後之嫡傳乎先生立朝風節
猷勞蹕絕一世非偏材曲學模
稜兩端者可幾萬一蓋其學問
根柢確有實際微言之絕以是
編為先生心印可也

中詮自叙

夫中非創自堯舜也維皇降衷於民恒性然
矣賢知過焉非中愚不肖不及焉非中仁者
見之謂之仁知者見之謂之知亦非中中道
不明不行於天下微獨聖學湮晦將四海困
窮因之此中庸所爲繼典謨作也秦漢而後
英君察相未嘗不尊崇仲尼而學庸襍於戴
記迨宋程朱始表章以行於世蓋幾晦而復

明矣

聖朝御極道脉中天學者皆遵功令由濂洛關
閩上溯洙泗可謂一德同風乃人心好異賢
知之士或陰獵莊釋遺緒恣其渺論至謂誠
敬爲贅爲外鑠誠敬亡則中亡也是堯舜仲
尼可弁髦也生於心害於政禍不與清談並
烈者幾希予自弱冠聞學見語空妙者殊扞
格不能入然沉潛體驗未敢易其言年近四

十覺豁然有所自信適里居默坐一小樓思慮
所至輒筆識之間念及古今得失之故亦併
錄焉已復出山荏苒簿書十餘載比省侍還
里自菽水風木愉戚外暇則復理舊業未嘗
敢懈寔藉此檢身戢志以希寡過非敢謂立
言垂世也今奄奄老至矣爰蒐輯成帙令兒
輩繕寫數本將就正於海內三三有道初以獨
言名篇謂考槃獨寤人莫有子和者顧予非

能爲臆說堯舜仲尼之言如是予誦述敷釋
焉耳有道君子寧無志相亮而聲相應乃更
以中詮名昔孟氏當楊墨橫流獨持空言爲
砥柱曰守先王之道以待後學曰閑先聖之
道以息邪說蓋自任如此重也媿予謏陋何
敢望孟氏萬一閑則吾不能守而勿失竊有
志焉世或以言之同獨知我罪我所弗辭矣
萬曆戊午夏四月丁酉新安汪應蛟書

汪子中詮卷一

萬曆丁亥戊子集
秋已刻於恒山公

人心心也道心性也操舍存亡無

彛帝則不能加損毫末不亦微

極也精而擇之執持衡是一而守之執握樞是故
盡其心之知者所以知性存其心所以養性

仁義禮智性也心之德也發揮於萬物而後性體見
焉以物則言秉彛者真知性命之情矣性藏用物
顯仁性其帝乎心其宮闕乎物則萬方臣庶乎性
通於物而格物卽所以知性其猶帝臨萬方乎萬
方克綏位乃不疚

人有心無耳目手足可乎曰痿矣有耳目手足無心可乎曰迷矣翳也迷釋也痿

夫煦育萬物仁也宰斷之各正其性義也尊卑貴賤有體禮也是是非非智也是謂明明德於天下

內之聰明以有所聞見則發外之聞見必心所同然則入故知在心者莫非物也匪物其知虛寂矣知在物者莫非性也匪性與物扞格矣故孟氏之良知非禪覺也大學之格物非徇象也明此者可與窮理可與盡性

性一也謂有天地之性有氣質之性者過也人之生

也氣以成形性寓於氣氣有淳漓清濁故其具性有偏全譬之太陽中天明一也寓之於庖廊則炳炳然寓之於庭屋則融融然寓之於突與屋漏則濛濛然其所寓殊也故曰未有不明者也性未有不善者也有不善氣質蔽之氣質非性也然則孟氏言聲色臭味性也非歟曰情慾也謂之性猶恒言情性云耳與天地之性並言者過也

性宰氣者也亦制於氣與曰奚爲不然貞元會則聖詰生光岳分則賢俊乏治世民醇亂世民暴夫性寓於氣成於習久矣君子格物以知之持敬以養

之盡性至命不言氣習

大學總聖經之條貫也故始格致中庸極性命之精微也故首戒懼然慎獨誠正通極於性矣明善固執履端於知矣夫道貫上下學無精粗脩身理人曰學之大也盡性合天謂之中庸也其命名也深乎

空有火麗物則明心有性麗物則顯故曰形色天性曰物則民之秉彜曰萬物皆備於我火傳於薪所傳者火也然匪薪則火熄矣性率於物所率者性也然匪物則性滅矣大火之在空中者雖泆水弗

能熄性之在人心者雖邪說弗能滅以其德不可見無所用於天下則謂之滅熄亦宜

夫靈瑩中涵心也心具性也寬裕溫柔仁也發強剛毅義也齊莊中正禮也文理審察智也容執敬別機惡可已也性之德也合內外之道也四德根心而時出故心爲萬物靈也四德不具心一形氣也雖有靈瑩氣之清明也謂氣之清明爲性烏乎見性

儒者言窮理曰一物不知吾儒所恥將使學者採玄罔扶神異兼觀察之藝盡通卜祝醫巫稼圃工技

之故而後可乎則開闢以來聖者幾何夫夷蕪禮樂皋契刑教其不能相爲久矣

儒者言佛曰道與儒同而教則異性道教一理也道同無二教教異則非道彼謂心生萬法實無所生謂慧覺實無所覺謂見性實無所見夫生則枝葉盛矣覺則變化起矣見則萬善出矣柰何天地萬物六根五蘊盡幻而空之

佛氏以空求覺覺復歸空其於心性猶日之夜火之蓄歲之冬也沉日於虞淵謂之日中天匿日乎厓火於寒灰謂之火燎原匿火乎歸根於玄冥謂之

歲四時匪歲乎夫沉而不升日將滅也厝而不燃
虛將絕也冬而不春元氣將歇也

佛入中國自漢通天竺始也其教盛行自達磨來梁
始也五胡亂南北分中國而夷矣故夷法盛焉重
以鈎竒詭之士襲其說斧藻之日新月益匪能
爲佛也談天畫龍欺世所罕知爲異而已其言蔓
其旨滴由君子觀之僅與晉清談唐詩律等耳謂
仲尼之徒而變佛乎哉

戎貊之人耳不習先王心不服禮義冥頑不靈若犬
豕麋鹿然也有佛者起湛寂爲心而慧覺爲性嗟

乎騶虞矣故莊周王通氏皆曰西方之聖人也夫
西方則聖中國則夷

有物斯有性而物不可謂之性有器斯有道而器不
可謂之道有氣斯有理而氣不可謂之理夫物固
有拂性者矣器固有畔道者矣氣固有逆理者矣
天之暴風淫雨人之恣情極欲可謂理乎盍以干
戈爲虐吏以文法爲奸可謂道乎儉子亂國虎豹
噬人可謂性乎惟君子窮理盡性則無適而不見
理無適而不見性故拂性之物可制而馴也畔道
之器可矯而直也悖理之氣可格而順也

雨暘時寒暑節天之理也愆陽伏陰非理矣幼長老
終根苗華實物之理也厲札疵莠非理矣雖然皇
極不修則沴氣應政令煩苛而百物凋謂之非理
可乎堯水湯旱氣之變距堯回天數之反不可謂
理矣雖然江海注而桑林禱則堯湯聖也樂道固
窮修身不貳則顏氏賢也故君子窮理盡性無適
而不見理無適而不見性

情性之性命數之命皆氣也非所謂天命天性也貳
氣絀緼五行錯授或清或濁或粹或駁或舒或慘
或長或促非天故低昂之亦不得故調劑之精氣

爲物萬殊故也若夫帝之降衷民之秉彝同原於太極聖與塗人一矣帝僕彭殤一矣

太極無形也無形則神而一先天獨立不新後天獨存不敝故三才一本陰陽五行皆氣也有氣則物而萬屈伸相感聚散相盪升沉相薄故有日月晦冥寒暑失序霖傷稼風拔木霧四塞氣不齊也天地猶不能齊而況於人乎況於物乎

明德者妙萬善而爲言者也明明德者妙萬化而爲言者也故隨其所顯設而新民寓矣謂明德爲內者謂心之虛靈爲德者也謂心之虛靈爲德此明

心見性者所以藉口

智者自察明者自照自察故能研天下之幾自照故能見天下之蹟夫闇於身而旁索於物約於已而刻慘諸人雖智慧徧寰區君子謂之無本

自視者小視人者小小人矣自視者大視人者大人矣夫大人者居已於賢聖而居人於皆可以爲賢聖是故不爲已甚然而貪夫夸士往往夾性命於榮途而托口乎圓變故硜硜信果聖人猶有取焉耳

尊德性道問學一理也而或各主一端格物致知一

事也而或各持一說其爲之徒者又各標赤幟以
相非訾嗷嗷焉如聚訟吾爲此惑且懼矣性也者
仁義禮智之謂也云德性者以別乎氣之情欲也
尊之爲言君也主也性爲情主理爲欲君所以尊
也精而擇之一而守之非學問曷繇焉廣大而精
微高明而中庸故與新厚與禮皆性體也致之盡
之極之道之其溫其知其敦其崇皆問學以尊性
也君子所謂問學蓋知行合矣擇執合矣戒慎恐
懼貫乎其間矣夫舍德性而言問學則支離舍問
學而言德性則虛寂理無精粗學無內外夫格致

亦如是矣

孟氏言存心非存想入定之謂也存其仁禮之性而
已言求放心非強制力探之謂也求其仁義之性而
亡而已仁義禮智人皆有之也動則物喪靜則來
復故於夜旦見幾希焉夫夜旦見人之性猶冬至
見天之心乎先王閉關息旅君子掩身去欲養微
陽以之盛也故先儒曰主靜曰靜中養出端倪夫
有所受之矣

良知之學非後儒創言之也孟氏諄諄乎詳矣然曰
以所不忍達之於所忍則知未必皆良也察弗精

將指賊爲子矣又曰知皆擴而充之不能充無以保妻子則良知未必盡充也力弗果將惡醉而酒矣又曰弗思耳矣非才之罪則思不可不審也才不可不力也故君子強學力行終其身兢兢焉卽心爲性生之謂性也心之精神爲聖堯胡以聖跖胡以盜也夫變化馳騁周流六虛心之神也其根本乎帝衷而動本乎物則斯謂之性矣盡性斯聖矣徒曰精神而已此釋氏慧覺所以不知性命何怪乎豪智權利之士謂問學無益也

天之命人之性物之則理一而已故性徹內徹外徹

人徹物徹天徹地故曰萬物皆備於我鈞不綱弋
不宿數咎不入斧斤以時皆聖人盡性之學也

言性體不言學問言透悟不言操修此學之蔽也昔
夫子罕言性至子思始詳之然語其功曰戒懼慎
獨卽戒懼性體見矣聖門善悟莫如顏子夫子語
以四勿卽四勿悟體見矣若乃涵養未和氣質未
變踐履未端私欲未淨抗手而高談於衆曰我能
悟我能見性吾何以知之

今之言悟者曰我默焉而太虛自運我湛然而萬化
在手問進修曰大道不可思議也誠敬贅也見砥

節勵行者曰細行未聞道也談之甚妙索之無當
吾所謂悟者稍異焉心不離性性不離行其精常
渾渾其用常炯炯寂感動靜無一念弗存矣晝夜
生死無一息弗運矣三千三百無一事弗察矣人
有夜寐而神動恍與人物構接如晝然者其身則
鼾然寢也是謂之夢乎謂之覺乎夢與覺必有辯
矣恒人不知學曰寐言學焉而未踐其境曰夢身
踐焉而作輟曰夢覺之間惟聖人然後可當大覺
喜怒哀樂未發一也聖人則全體太極性體與天載
合矣衆庶然乎哉孟氏言性善真體一也夫子言

性相近分量殊也夫性之必善猶火之炎而水之
潤衆庶星星聖人則洪爐焰焰欲燎原矣衆庶涓
涓聖人則淵泉混混欲放海矣故曰若決江河沛
然莫之能禦此天縱非人力也故聖人江河君子
潛伏

喜怒哀樂未發性也發中節亦性也推而慶賞刑威
禮樂征伐皆性也大自規天畫地刊山濬川徼至
羈馬輻牛圉豚駟犬駉虎豹穿犀象皆性也求性
於未發謂性有內乎哉求性以成身謂性有我乎
哉故能盡其性則能盡人物之性盡人物之性卽

所以自盡其性

至賾而不可厭者物也至一而不可遺者性也至變而不可逸者心也心逸則性離矣戒慎恐懼無寂感顯微一也慎獨嚴乎其寂感顯微之交也學問思辯篤行致戒懼之實功也夫戒懼所以存性成性存存道義之門

惟天生民惟聖代天民之弊賾聖爲耳目矣民之顛隕聖爲手足矣自非大無道之世聖人未嘗不在朝市尹不逢湯聘說不入帝夢天民雅抱與說命三篇必有見於世乎其達也道行其隱也言顯

堯仁桀暴易審也言堯言行堯行一念獨知匪堯也
去堯遠矣比干忠蜚廉佞易審也言比干之言行
比干之行一念獨知匪比干也去比干遠矣夫王
霸誠僞之辯毫釐千里故好名之士或矯迹於揖
遜而見情於簞豆縱欺人不能自欺縱可欺當年
不可欺來世

三代而下利之入人何深乎未得也蠅營既得也蟻
聚固有致命而爭未有遺力而讓者也儒者矯枉
曰士惟恐不好名夫磨鈍振靡蕩穢揮氛非名教
曷繇矣然好名不好學則矯揉忿戾之習生焉無

論行非中庸卽此念少襍已不可與入堯舜之道
是故湯武革命誠厚蒼生也夷齊扣馬誠重綱常
也莊生誕曰夷狄同殉嗚呼使夷果有死名之念
則首陽與東陵相去幾何

伯夷太公避紂世黃誠終矣不有西伯烏來就養明
哲保身一也其後揮戈者何武叩馬者何固執經
達權異也然若非周武夷不諫若曰先君有天下
二以服事殷願嗣君無改舊德乎其諫忠武也忠
西伯也曰父死不葬臣執君者齊東野人之陋也
首陽之餓諫不可而毫遜乎曾去商亂食周祿矣

匪商民胡然而與商難曰不義周粟亦非夷之心哉

夫是非不並立也經權時互濟也自古聖賢不炫奇
詭不膠故常求仁得仁亦各信其心成其是而已
故時異行異滑修陋巷與底績九州一也觀兵孟
津與安節美里一也亦有時同事同而行異忠諫
剖祭器歸營丘封西山餓要以自信其心無愧於
天地神明一耳書曰人自靖自獻於先王在殷三
仁在周二老

人主精神必有用也臣詩書則淫樂矣國家幾務必

有任也匪公卿則婦寺矣夫惡嚴檢曜寬縱自衆庶莫不皆然而况於至尊乎古者天子嘗居內朝奄寺惟供洒掃輔拂疑丞不離乎左右自非張弛有節志意和洽能然哉日厭圖史諷咏焉可也體厭衿莊游息焉可也故七月風謠卷阿泮渙古聖賢格心之用微矣其音節雍容諷導和婉千載誦之猶能使人主興焉後世儒者抗儀於坐請正色於折枝以道則正以術猶疎

士有修之朝堂而壞之閭里植之盛年而隳之晚節者何矯行於名譽則真偽難掩競修於意氣則始

終難繼夫惟實學實修之士潔源而固根焉寸積而錄累焉則窮彌堅老彌邵斯之謂君子

古者天子自稱曰予一人非域中無二之謂也若曰予僅以一夫寄於王侯君公之上恐天下莫吾與也諸侯曰孤曰寡非國中無匹之謂也曰吾子焉以身奉社稷恐國人莫吾助也是故其稱臣曰鄰稱民曰子羣臣協恭而後一人有託也萬姓協和而後一人有慶也

人情寬縱則易濇嚴畏則難久一張一弛文武之道古者人君夙夜無逸然而春秋有省五岳有巡蒐

言
卷一
三
狩有時講武有節臺囿有觀辟雍有樂無非事也
志意亦宜暢焉其君臣相與有湛露之燕有飄風
之游有咲語之歎有賡答之歌相適乎情性而相
迪乎禮義故萬幾兢業則臣主同憂九重喜起則
明良胥悅是以拘檢不勞荒淫不作晚世深居稱
朕堂陞萬里一切會同蒐狩之典不復舉矣儒者
弗按所繇徒曰人主必抑畏無耽樂身絕師傅耳
絕箴規而曰毋淫佚豔女充前美男羅側而曰毋
荒色自非天授上聖其曷能自樹乎哉

終禮虛庸尸位其君謙讓禮樂也金陵堅僻專任其

君銳意興復也故經制禮義之談見謂高論誠意
正心之學見謂遠情千載明良適相值而兩相負
也天乎人何尤

韋布環堵之士事至簡慾至寡欲修身正行以見於
世非師友猶莫能立况天子獨居法官宦妾之與
處而百慾之叢集哉故以道格人主者必先泰交
泰交必明張弛

諫臣之義有犯顏無隱諷乘輿大過不敢斥言則隱
大臣之義有隱諷無犯顏社稷大故不敢不力爭
則犯

宰萬動役萬動者身乎剛柔不齊者氣乎縱橫難御者情乎語問學則正身修行先矣語修行則反情養氣始矣腔隔寸區未能調而妄云燮贊乾坤軀殼相迹未能融而猥語性命神化譬之騁敗輪於千里索朱草於糞土也庸可幾乎故動容出辭道所貴七情中節謂之和

靜與天同體動與天同運於穆不已日月常明四序迭經萬彙流形潤以雨露鼓以風霆吾師乎吾師乎吾聞其語未見其人也齊心神勿動遵古昔非聖人之志不敢存非六經之言不敢道非禮義之

行不敢行君子哉吾友也已

君子莊敬則身爲物宰安肆則爲物役抑抑威儀惟德之隅君子戒慎未嘗失色心定者言重以舒不定者言輕以疾躁人辭多吉人辭寡老氏亦云重爲輕根靜爲躁君柰何萬乘之主而以身輕天下故君子小心翼翼以事上帝羹藿藿一食息不敢忘也金絨囊括一啓齒不敢忘也規旋矩折一跬步不敢忘也嘯辯以爲材儼捷以爲敏諧言戲動以爲清曠既喪爾德復離爾營是

以非時不鳴也鳴則太平兆矣其鳴有節有數焉六

律中五音諧矣使鳳而如百舌之囀春鳥鵲之噪
晨也如鳳何惟王亦然其質溫潤其聲清越以長
琢而爲鳳應采齊肆夏君子知鳳之鳴知玉之振
辭氣可不慎乎

仲尼春秋匹夫也律天襲地祖帝宗王德業莫加焉
萬乘天子尊榮在當世異代則否仲尼北面帝王
而子弟之萬世一日一匹夫之身何修而至此修
諸身以內也君子貴其身過於有土之君曰爲仲
尼在茲故鳳夜時保不敢以呼吸喪吾重非道也
非禮也雖得以及公孤悅以聲色權利若寸雲過太

虛矣

易之爲教聖人緣天道以察人事因神謀以定民行也剛柔異用時位靡常闔闢變化惟道所適於是乎稽疑焉耳乾之亢戒持盈也坤之霜示防漸也德匪黃裳吉乃凶也卦各有所象也爻各有所之也君子觀象玩辭反凶趨吉變易以從道也不惟其道而利害得喪焉問妄也易不以告君子不以筮

古者建國遷民祀戎大務多稽諸十世儒以此別著絕長短非然也夫灼龜而鑽方弓義功惟枯骨之

靈而人不與其於事也決猶豫定滅否而道未必存益近乎術數焉矣若夫著成於聖人之掛揲象於聖人之爻象參天地法陰陽消息盈虛畀我明命矣剛柔動靜迺我周行矣故知著卦之德者可與通神明盡性命知來長短易云矣

世無盡性之士以嗜慾滅真者多世無純行之士以夸毗喪實者多夫性情言行盡心身之用矣養性制情慎言敦行盡正修之功矣舍是焉而曰問學謂之涉獵也曰戒懼謂之虛寂也

三之惕其乾體乎二之直方其坤體乎惕以終始何

虞亢矣直方以終始何虞永何虞戰矣故曰利貞
引而伸之三百八十四爻一以貫矣專翕之理備
矣易簡而成位乎中矣

聖人之學藏之方寸而運旋宇宙謹之呼息而流貫
終古天地爲師三五爲傳富貴貧賤不能干其志
利害死生不能撓其慮非天下大勇其孰能當之
得北宮之勇者狂乎得施舍之勇者狎乎

顏氏魯國年少也且窈人子易爲敢稱舜哉其世唐
虞其位元后其德重華卽稱焉易從而爲焉偉哉
顏氏必度其心有一念千聖度其力有一息千古

者矣夫聖門大勇莫如顏氏其次子路聞顏氏希
舜矣未聞子路之希某聖也

天體至大其道至仁惟仁所以成其大古者混沌之
世民未知親戚上下用谷不能相通百人異羣百
里異聚有聖人者起爲之建萬國設君公被以政
教致以舟車親以朝聘通以財賄然後民物一氣
華夷一家貨不必藏力不必私外戶不闔胡越相
適不齋於是乎天之至仁始昭融浸浹於覆載間
矣故曰聖配天故有外之見不足以合天有我之
心不足以語聖

紆金曳紫人以爲華君子服之則有覆被閭閻之憂
珍羞肉食人以爲甘君子嘗之則有粒食衆庶之
憂高厦丹楹人以爲安君子居之則有寧宅下土
之憂惟貧賤亦然口厭莢藿曰饑者獨我身乏完
褐曰寒者獨我廬不蔽風雨曰露處者獨我豈君
子好爲過計哉畏天憫人性分固然矣是謂天地
爲心萬物爲體

君子勤社稷不辭拮据雖食沐瞬息弗遑焉勞蒼生
不辭胼胝雖鹽米凌雜必躬焉凡以行吾道盡吾
性也爲名高而爲之次矣博名高而希寵利抑未

矣

士之所以不能盡性履道者以嗜慾汨其中情習移其志也茲有人焉衣敝裘不愧華袞餐藜糗不愧肉食棲蓬草不羨旃廈樂綦綦不羨姬姜是足與議矣乃學之不敏爲之不力日遷月化竟不能入聖人之室是天與美質人自棄之也厮隸焉同生草木焉同死悲夫

或問長生曰常生者生常死者死又問曰常生者死常死者生未達曰爾於萬物無弗愛也其德厚其天和矣夫焉得不生爾於萬慾有弗撓也其神寂

其天定矣夫焉得不生生死死死死生是謂
性命合一

同畦而稼糞勤者刈豐同風而舟帆楫具者先駛湔
潦成浸稷不能爲稼已亢陽赤地良農汲甕而灌
猶入其半焉風濤撼天暴不能爲舟已回颶衝檣
長年者竭竭而力挽之猶日致五十里天人力命
之際此足以徵矣故君子持世定頗不言運之否
泰節慾養生不言數之修短盡性作聖不言才質
之豐嗇

大學務洗濯不務粉澤務斂藏不務宣暢惟洗故澤

惟藏故暢故曰聖人以洗心退藏於密上天之載
無聲無臭密之至也佛氏愈寂則愈空吾儒愈藏
則愈密至哉密之義乎天地以此貞觀聖人以此
貞一

馳騫宇宙勤思參貳惟此一心曷云乎放心也心有
仁以利欲而生殘忍仁喪矣心有義以利欲而生
邪僻義喪矣放心云者失其仁義本心之謂也求
放心者反其不仁以歸之仁反其不義以歸之義
也釋氏以圓覺內照爲心不知仁義何物可謂求
放心乎凡吾儒言心多合性言之也其言性卽四

德之根心者也釋氏言心獨指心言之也其言性亦心也不識性又烏識心

學不適經濟者不足謂之學道不達權變者不足謂之道才不本寧靜者追逐之粗才也智不由光大者機械之私智也故詭僻之行或以獵虛聲雄黠之能或以標鴻樹問學君子恥弗爲之矣

士有希賢希聖之志則日益矣有自賢自聖之心則日損矣故聰明絕俗居之以愚功伐蓋世守之以謙非有而示之無能而示之不能也望而未見從而末由其心誠惕然不自足也故聖賢之於問學

沒身爲耳已

家天下未若官天下之大也封建未若選舉之公也
天生大賢大聖時出乎東海時出乎西海豈世世
敬承哉蒞天職阜天民惟賢聖是畀天之道然而
三代聖人世及不嫌私封建不更制者何也生民
之初川谷異聚千百異羣其間自有衆推而聽命
者若蜂蟻有主然聖人各因俗順性爲之建置君
長蓋亦天道自然非聖人強以私意智力設也風
氣漸開政教亦密協以時日輯以符瑞同以律量
權衡聖人以爲是足以比萬方安黎首矣且各因

其國登其賢能爲之卿大夫士未嘗有賢聖遏抑
不得志也至周受命幅幘寔廣海內爲國者千有
八百大畏小懷化及重譯聖人當此時安得無故
而興剗削五等之議起絕滅延世之端若曰商周
藉諸侯取天下勢不能易是以私窺聖人也及周
衰弱肉強食陵夷逮於戰國離爲十二并爲六七
則封建之法已窮雖有湯武受命而興勢不得不
罷侯而置郡縣郡縣雖奈人私意要以順時創制
聖人所不廢也夫國大則難御民衆則難使藉令
漢時復立六國後亂不旋踵千八百國業并而六

七矣復析六七而千八百易任賢而任子聖人寧若是迂耶循後王之軌酌前聖之法明選舉重守令賢者登崇不肖者屏黜所謂奉天道官天下何必去棟宇而復巢居厭書契而更結繩也若夫井田以均恒業學較以敦德行千萬世繇之矣

自古批鱗於當宁者天威易霽齒路於當衝者陰穽難測故杜谷詆諫忠之賊也王章殺身志可則也律之本黃鍾也所以驗中氣而定中聲也至治之世其政寬平其民愉穆故陰陽順序而中氣應衰亂之世其政暴弛其民愁慢陽愆陰伏夏雹冬雷中

氣曷從而候焉是故宇宙有太和然後天地有中
聲非其時聲未可定也若唐虞成周所以勅天基
命燮贊太和則具在詩書矣

漢唐而下議制律者何紛紛靡定耶候葭管則治亂
剛柔異較秬黍則豐歉大小異儲者高論輒曰器
數耳是有司存夫律與天地準未可以器數言也
伶倫后夔皆智慮符神明呼吸息合陰陽天所命也
道不虛行存乎人人不世出存乎時夫至治熏蒸
諸福畢應鳳凰麒麟騶虞白澤之獸莫不來格而
況於人乎有堯舜者起化登熙治德至清寧將必

有倫夔絕智之士應景運而定制者焉俗儒區區
錄測烏足以知之

禮樂必百年而後興信乎曰否學不可斯須去於身
治不可斯須去於世微禮樂則百年之閒所施設
何物乎曰中聲未定如樂何曰王者承敝更始蓋
必有草創焉古樂章三百篇洋洋乎備矣今之琴
瑟鍾鼓笙磬祝敔亦猶循古之制也擇其所宜奏
用之廟朝用之邦國用之鄉人去繁促崇雅淡一
切淫哇桑濮之音禁絕弗得作樂其庶幾乎若定
律盡制需時矣

叔孫起枹鼓而制禮當乎曰否禮序萬物經萬化彌
綸天地獨庭陞升降云乎哉叔孫襲秦儀尊君卑
臣苟悅人主意耳未聞有品式章程達之天下也
烏乎言禮兩生儒而腐叔孫則優二者皆譏有以
夫

強本節用儒墨家所同君尚儉爲厚下也民尚儉爲
禦窮也上之瓊林大盈聚矣姦夫壘斷敵國矣猶
教之儉乎是塗附也貨壅而不流貧民束手莫得
資其簞豆苟爲貴儉哉夫明主欲仁天下則定經
制薄賦歛先矣

今之驛禁可寬乎曰送往迎來先王有賓禮矣費煩而鉅曰賓饋一僕馬什以郡邑之費廩其郡邑之人奚其鉅且吾嘗過燕齊魯矣過趙宋魏矣其僕從皆帶索枵腹也者一日不食去溝中瘠無幾徭與賦出乎田與身者也非有中人之產等小寡矣富出貲貧食力以苟免於溝瘠也不亦可乎

仁者愛人故惡人害之義者正人故惡人亂之夫兵也者不得已而用焉者也夷亂夏寇亂民苟可以文告懷可以先聲懼也聖人將師而不陣陣而不戰至於戰不得已矣譬諸虎豹噬人必制以權術

故飽則饑之逸則勞之怒則衰之利而誘之似餌
伏而狎之似寢事半而功就暴亂戢而士衆不傷
是故以正治國以奇用兵吾不敢右宋襄而左聃
老

善教天下者太上道之其次耻之其次懼之耻之云
者賞與罰之謂也民有孝弟姻睦敬事長上表宅
里詔爵祿以風樹之有弗耻焉者寡矣其有弗孝
弗弟弗若於訓移其居緒其服終身不齒有弗耻
焉者寡矣奈何叔世不務耻其心徒懼以刑劍不
甚則不痛甚則死往則忘又多賸與赦民有幾幸

之心故刑日煩而姦日益廣是以聖人於民先道而後耻先耻而後懼匪疑匪矜不得與贖赦夫武以止戈刑以止辟

民有聰明穎慧之資者宜士有勢悍驕銳之氣者宜兵有心計技巧者宜賈而工木彊而耐胼胝者宜農此非獨人事亦天道也封建世卿大夫而士有不得見才者矣衛所世卒伍而民有不得賈勇者矣彼其勢悍驕銳之氣既不能俛首於稼穡技藝饑寒外迫勢安得不轉而爲盜可以兵者驅之使盜不可以兵者強之授戈是治盜與治兵策兩失

也今天下欲強兵以銷奸萌以備夷虜其惟選練鄉兵乎衛所之清勾也變而就近可也父子之替役也變而選其丁壯可也

三代以上先造士而後取士三代以下有取士而無造士詩曰濟濟多士文王以寧又曰周王壽考遐不作人懿哉文王之所以寧乃文王之所自詒也今郡縣學官設矣弟子員備矣有教學論訓之虛名而無迪德砥行之實益以文詞取之而以匡王植國望之此必天生異材爲世用則可於作人吾弗知矣

人有恒言揮金如擲塊戮人如刈草而後可爲上將
豈其然哉古今出入將相勲業格天莫盛於阿衡
乃一介弗苟與殺一不辜得天下弗爲其併包兼
容如天地之覆載其研幾精義如日月之昭朗至
大而至密至廣而至微視後世豪傑作用霄壤懸
矣

夫聖賢非必不取不與如於陵之操也非必不殺一
人如宋襄之愚也賞當功戮當罪可慊於吾之心
可通天下之志故有時一介不與有時以天下與
人不爲惠有時一介不取有時取人之天下不爲

貪誅獨夫殲渠魁不用命戮於社若盈城盈野之戰驅無辜以就鋒鏑雖得天下弗爲然聖人所以得天下與守天下斷不在善戰善陣也

聖人十五而志於學蓋常誦詩讀書習禮學樂其精神意念已得讓堯舜之庭而趨承文武之側持此志須臾不舍如火燃泉達日新月盛安得不直造聖神之域也耳順從心不思不勉矣此志與天不息有生熟無存亡至兩楹夢斷而後已也

均是人也有人者天地合德日月合明四時合序鬼神合吉凶吾七尺之軀與大人同耳目心思同

吾何以弗若大人哉是故君子無一念不志大人則心無一息不依性命無一息不依性命則視聽言動各中其則喜怒哀樂弗汨其真處富貴貧賤夷狄患難無入不得心一而已執一心宰攝萬變非因萬變而檢察其心也是謂一貫是謂何思何慮

書稱禹不矜不伐故天下莫與爭功能夫聖人非自謂功而抑之不矜自謂能而抑之不伐也懷襄始平管窺者未有寧宇何敢言功昏墊雖拯稼穡者尚需繼緒何敢言能蓋聖人天地爲心覆載爲量

宇宙間有一事之失理一民之饑寒一物之夭札無不任爲已辜方皇皇然愧悚之不暇寧暇矜與伐乎哉叔季士志卑識陋區區與庸衆絜長短與權謀功利競後先功能稍見於天下則不勝志得意滿此三歸反玷霸佐所以見小於聖人也

知世不可而不爲者賢人也知不可而猶栖栖弗舍者聖人也宇宙在吾身造化在吾手君有一念之明納牖遇巷猶將爲之故轍環列國席不煖而突不黔然守義安命進退存亡歸於不失其正此聖人所以猶龍也

際唐虞而傲荒怠對聖哲而鑒丹朱言之危也戒懼
於不昭不聞敬信於不言不動行之危也君子體
天行健朝乾夕惕與此身爲終始曷窮通治亂之
有焉若言則無失時也無失人也非時非人則囊
括金緘可矣危者安之反也孫者任之反也如春
秋孫於齊之孫不以身任天下國家故言可孫彼
自有任之者也居忌諱之朝食昏亂之粟而曰默
足以容乎是聖人以竊祿無耻教天下也失其旨
矣

楚弓與人弓孰公也魯鼎與吾鼎孰重也知人弓之

無足恤則一切智能勲業與豪傑共之何必在已
知吾偶之甚可愛則一切成敗利鈍與造化順之
何必喪已故執同異得失之見以隘包容之量徇
已者也舍馳驅而詭遇以希王霸之功喪已者也
不可徇者私已不可喪者真已惟君子獨見真已
是以能忘私已

知非艱終知之艱言非艱踐言之艱夫士也坐環堵
而馳情八極對陳編而驚意千古揣摩生見解見
解生談議自謂識際天人術窮經濟矣比體諸身
措之於用蔑如也知與言易貴哉是以聖人虛其

心於無知欲立教於無言

謂空與覺爲二譚釋者不謂然也卽空爲覺是名圓
覺卽覺爲空是名真空一覺之外其衷曠然湛然
事至物交淡然泊然高明智慧之士自以爲卽此
遂超凌上乘立證元始矣本之於天地曰無聲無
臭易知簡能如是矣稽之於聖神曰不識不知何
思何慮如是矣自清淨孰爲非禮自無欲孰爲克
己其持論在太虛之始其處地象帝之先而儒者
方曉曉然非之曰吾儒本天釋氏本心是不足以
箱其口而適資其竊咲也夫釋氏所論乃近似於

至聖合天之事然西方之人其嗜慾淺薄而易去
其於倫物法度簡畧而易遵故無事而曠然湛然
物至而淡然泊然則其道盡矣然以彼諸祖猶皆
循持苦行十餘年而後得之則上智之難也今日
頓悟云者豈惟誣聖且誣佛也夫本體自然至善
無惡者吾性之真原也戒慎恐懼閑邪存誠者養
性之實功也經緯萬化洪纖悉備者盡性之全體
也彼所謂本末面目乃泯然未分無善無惡之境
所謂覺性卽以知覺運動當之任心無爲復歸混
沌其於帝求物則秉執有恆者蓋未之著察焉曰

覺實無覺曰萬法實無法五蘊皆空非未發也當其曠然湛然似中非中萬象皆空非中節也當其淡然泊然似和非故自謂與天同體而窮神知化則踈自謂執天之行而開物成務則泥然而古今豪傑之士往往樂從其說而莫之覺者則喜於欲速而輕於自信故也夫喜欲速而輕自信惟豪傑類然矣

釋氏因空以見性空之烏能復有之有之空者復窒覺者復暗矣故其道歸於清淨無爲吾儒戒慎以養性愈戒慎性端愈充充之不已萬善具萬化行

矣故其道至於彌綸天地而成萬物或謂儒釋於性命根源本同而教則異愚謂教之異也正起於性命之原毫髮差也使真知吾儒所謂性則豈必空之而後見實見之則萬化流行自惡可已何獨以法身不滅超出生死爲登彼岸耶

人以健爲常人心以敬爲體終日乾乾夕惕若法天行也於穆不已時自行物自生健之至乎至誠無息天地自位萬物自育敬之極乎夫敬則欲不能入故本體常湛妙川自流敬所以閑邪也閑邪以存誠也克欽舜恭安乎敬者也湯日黜武勝怠勉

乎敬者也譬操舟行乎江河轉移變化在於一舵
旋兢而守之靡瞬息離焉彼置心何有恬神寂寞
自謂舟與水忘水與舵忘雖長年三老不能得之
龍門巫峽矧嘗試操之者乎詩曰其何能淑載胥
及溺

作二典者其知道乎堯欽明誠明也舜文明而後允
塞則近明誠矣夫明何容易孟子曰始條理者知
之事也知譬則巧也夫子稱大智曰舜舜之智豈
訓詁之儒所謂博文格物者哉然好問好察不離
乎博文格物矣不離乎博文格物而有所以淵然

獨識超然總覽者是聖人之智也所以爲始條理也萬物隨矣宇宙變化繁矣博而索之秩乎有紀神而明之渾乎一貫是故觀天地萬物之全而不囿於見也達盈虛消息之變而不局於時也會仁義道德之蘊而不滯於方也故曰博學而詳說之將以反說約也學至反約則明矣智矣可與誠矣可與時中矣

大有五行順之者昌地有五氣宅之者長人有五事蹈之者王毋逆天道毋絕地理毋亂人常通天地人曰儒用天地人曰聖是謂三才紀綱

天之道陰陽閭闔盡之矣地之道剛柔屈伸盡之矣
一闔一闢而變生一屈一伸而利生此天地所不
違千聖弗能易也其流至謫詐相傾權利相擠於
是縱橫家出矣鬼谷道之齋手儀秦鬼谷之濫乎
譬諸飲食男女生人之大紀乾坤之大義而舍龜
以覲而聚塵以賣豈其性與故則然哉故權者聖
人弗諱聖人能用權以經緯萬變鼓舞羣動者至
誠故也夫天地變化草木蕃誠而已矣

聖人之於天下安利之而已其於身亦然聖人所謂
安且利者非常人安且利之謂也君明臣忠父慈

子孝祿位名壽與道德性命合矣安富尊榮與忠信豈弟合矣如其不合聖人且順受焉無所喪吾身無所失吾道故明夷之世可奴可囚而志節不易流言聿興東土是辟夫愛身所以愛道所以愛天地是故一語一默守道之宅一顯一幽秉德之符專而直翁而剛雙屈而伸龍藏以蟄莽大夫曰哲乎孰靡哲哉被髮而狂廢可矣守先聖之道藏之石室傳之身後見吾志可矣

亡國非一佳兵爲最亡生非一好色爲最人主豈不知之常蹈之曷爲貴知矣釋干戈修玄默絕房帷

齋戒其根難拔則怙然弗歡強而遏之且發狂
疾廣忠憤日接之途勒詩書俎豆之業聖喆承弼
植其志則治範弗留明矣中和禮樂怡其性則驕
忿無滑真矣語云不見可欲使心不亂未若見所
甚欲易所可欲也未若心常治亂弗干也夫欲見
所甚欲治其心則莫如剛聖人曰我未見剛者
魚游於水潛躍响沫皆水也人游於天作息呼吸皆
天也盈天地惟氣卽氣卽天天之入乎人靡間於
膚臟髮竅矣謂天聽卑鳥乎用聽謂天鑒邇鳥乎
用鑒故一念善惡殃祥類至機動氣應雖天亦莫

知其然孝婦冤而雨竭義士泣而霜飛誠之極氣
之變與風雷拔木金縢啓藏天所以眷聖人也當
其藏之易意乎啓之風雷曷作王曷卜精誠潛召
若有神物以使之故曰至誠動天莽之藏以偽啓
也以偽誠偽相去奚啻萬里而以文貺姬周公懿
哉不難何待

系石而爲浮屠高數十仞朱碧銀黃燦爛天日登九
層之上四望焉茫茫乎九州一指顧也其歷世則
數百餘歲遠者或千餘歲嗟哉世無百年之人人
有萬年之樹無競哉人乎夫累學而成聖者孔孟

也累事而成功者禹周也故曰予手拮据予口卒
瘁亦夙夜累之而已累之而不成與不累而自成
者我未之前聞也

能潛必見也出則霖雨止則洙泗謂之非見可耶潛
而後見見不離潛潛爲體見爲用耶心烏潛潛乎
道道烏潛潛乎行曰遁世顯晦一矣曰不見是毀
譽一矣神光淵懿精氣騰徹雖陋巷窶子敝裘耕
夫猶名實照天壤欲無見得耶

夫語出世於經世之學其猶夏虫乎求輔世於媚世
之夫其猶羶蟻乎一人倡之千百人效之謂釋那

上聖謂鄉愿中行譬諸食厭稻粱而錯羞焉問匪
是弗登於豆矣駕舍騏驎而驚蹇是求匪是弗御
於駟矣昔夫子作春秋夷則夷之其稱鄉愿曰德
之賊吁嗟乎世之言性命也鮮不爲夷世之言操
行也鮮不爲賊戎狄外侵寇竊內訌則有其故矣
漢文詔曰度地非寡民非益而食不足是爲酒醪以
糜穀者多而六畜之食者衆也夫中人得斗米可
十日無饑而豪華貴介浮白引滿爲長夜之歡斗
酒立盡鷄豚狗馬之畜食人食者歲居十之一二
穀安得不糜食胡以足且賓主一宴動費一金駢

桑饑夫得之可數月無死則廢一宴可活一人之
命也廢一宴可活一人則舉一宴是殺一人也而
人且歡樂呼笑以行之不知其有殺人之慘也夫
計財無輕毫釐計穀無輕合勺富歲積有餘凶歲
補不足安有天地之產而不能養天地之人充此
類文緒不飾則天下之布帛賤淫巧技奇不作則
天下之歸農者衆故曰國胥教儉國儉教禮
天地一氣之例范也萬物一氣之錢書也五行相錯
而榮悴生萬化相軋而吉凶生總之一氣貫浹如
響斯答如影斯附不知其所以然而然是故以生

機感者生亦應之以殺機感者殺亦應之螭雀相
尋環草輒報孰知夫寧人之所以自安也孰知夫
慈物之所以自拯也人皆知顯酬顯罰而不知陰
酬陰罰則遷代變華門望裔或淪於兵燹而王公
將相或起於民萌其世所醞釀匪一朝一夕也又非
笑貌聲音之故也人故莫能名焉德無幽顯期於
殫厥心善無大小期於充厥量本情性而爲之者
機深矜名行而爲之者機淺

以手援者用微以道援者濟博矜一手一足之惠而
被髮褰裳以從之物未及濟而道先喪矣夫手援

未若道援之大也已援人未若人援之廣也以道
援人以人援天下其爲手也萬矣其爲濟不可勝
窮矣故堯舜不援唐虞援岳牧仲尼不援衰周援
七十二子

德性之知良知也聞見之知亦良知也性無內外心
亦無內外謂聞見之知爲外者是謂心有內外也
意言象數入乎耳觸乎目感於心而知通焉知在
物所以知者心也故裁制萬事曰義辨析萬物曰
智告子嘗外義矣豈其智亦有外與

夫聖人之道廣矣大矣起於方寸而經緯乎乾坤發

自靈明而宰制乎萬物飲食言語生死晝夜其流
形廓廟畎畝禮樂干戈其運布織細則蠕動天喬
各遂其生適其用洪鉅則三光岳瀆各效其靈資
其利洋洋乎浩浩乎吾不能名其譬之江河乎或
飲或烹或濯或濯惟人所挹故老氏挹之以復命
釋氏挹之以見性陰陽家挹之以言順忌縱橫家
挹之以言捭闔刑名家挹之以言輕重斷舍兵家
挹之以言奇正虛實醫家挹之以言氣脉藥餌卜筮
家挹之言悔吝吉凶博士家挹之以藻續詞章法
術家挹之以富強天下彼皆得其偏未該其全見

其內或遺其外掇其粗或失其精夫能合內外精粗兼備而時出者其惟聖人乎是故道也者渾淪磅礴不可得而執也執之則已涉象器矣不可得而言也言之則已滯偏局矣易曰仁者見之謂之仁智者見之謂之智故大道無名大聖無所成名江河百折總歸潤下聖人順之而弗逆也戎狄非族寧無陸梁聖人外之而弗內也故治水者溢則疏閼則濬治夷者來則拒去不追溢弗能疏而隄防以塞決決氏之作俑也弗能拒而金繒以講好趙宋之釀爨也順水之道費水之利舟楫何所弗

至幽平以天王蒙難秦趙以小霸却胡夷夏盛衰
在人事經綸謂何耳故善計不滯一方善強國者
不襲故常

合天地萬物以成身者其人乎處天地萬物而各當
者其性平家庭廊廟天秩叙矣禮樂干戈天命討
矣威儀動作帝衷寓矣耕稼陶漁物則著矣反身
而誠盡已性以盡人物之性也功與造化並身與
天地參云胡不樂強恕求仁致曲之事也仁則誠
誠則天

天下之道盡於易聖人之學盡於學易象盡意又盡

情辭盡言變通盡利鼓舞盡神宇宙之運旋萬化之紛錯人事之臧否得失靡不由乎此矣立本者易簡趨時者屢遷神而明之盡性至命聖人也觀而玩焉精義入神君子也執著策求掛牒以知吉凶趨避衆庶也夫聖人洗心齋戒君子懼以終始回而神者心之體乎方以知者事之則乎易以貢者事有定則而應無常用乎故聖人存主踐履無非易也以進德脩業以酬酢云爲以開物成務以裁成輔相天地純然止乎至善無虧欠也確然依乎中庸無差謬也

一陰一陽互根不已者天地之德也一剛一柔時出不窮者聖人之德也陽不能無陰剛不能無柔故有中國則有夷狄有君子則有小人陽爲陰主剛爲柔君故內君子而外小人內中國而外夷狄陰之勝陽也柔之乘剛也私欲之蔽理也譏邪之害正也裔夷之謀夏也是氣運之否泰人心之淳漓世道之治亂所由繫也聖人懼焉中古之世善人不善人半中國尊四夷未畔第調制內外俾各當其處可矣故周易起乾終未濟文王之易也春秋末古羣邪道長夷風日競幾於剝矣匪去邪曷以

存正匪攘夷曷以綏夏故禘卦起乾終夫孔子之
易也乾純陽也未濟一陽一陰各得其處也夫以
陽夾陰復歸之純陽也

惟天生物惟人最靈中國蠻貊皆人也鱗鳳龜龍與
豺虎蛇蝎皆物也人居物中爲萬物宰聖智居人
之中爲萬民宰皆天也夫人性亦猶是焉性從心
生凡生於心者皆性也如耳目之於聲色口鼻之
於臭味安可謂非性故謂性卽心可也惡亦不可
謂非性也然究厥精微視聽食息自有天則父子
君臣各有極致故謂性卽理可也謂性善與堯舜

一可也天地之德曰生雖夷狄猛獸有時乎肆害而君師寵綏其爲生者自若人之性至善雖氣偏物誘有時乎肆惡而彛則中秉其爲善者自存故荀氏之言性惡也見其粗未識其精也楊氏之善惡混也執其粗並論其精也釋氏之無善無惡也厭其粗併去其精欲還歸太虛也執天樞以運羣象秉曜靈以照萬境當於性善求之

易無思無爲寂然不動感而遂通天道也聖人極深研幾以通志成務人道也

支黃新合萬品流形雌雄偕和庶類蕃生堂廉歡協

事正邦寧壹閭和暢家道乃亨蘭金契洽業茂聲
宏華夷安處偃鼓息兵忠邪器使王路蕩平故事
或激之以階亂道有順之以相成馬牛可飼以服
乘鷄犬亦資其吠鳴使椎髻雕題可得而羈縻何
必繫以長纓盜賊狙詐或奮身於功伐何必執小
信而錮脩能

聖人因時以興萬事不執一事以御萬時夏而制葛
不可以禦寒也冬而制裘不可以當暑也勢所必
極理所必至聖人變而通之乃可以久封建既郡
縣矣井田既阡陌矣選舉既科目矣濟郡縣之窮

其嚴責監司乎通阡陌之變其限民名田乎救科
目之敝其先論行誼乎訟獄繁而刑戮舛故肉刑
變而笞杖漢主之寬明也兵權擅而干戈擾故藩
鎮變用儲臣宋祖之英斷也

天潢盛而租賦日重民不勝敝矣租賦艱而祿養日
訕宗室亦不勝敝矣弛出城之禁任四民之業親
盡則絕弗予作化裁不可緩乎或曰燕邸踐樞寧
深窺曲殷鑒不遠焉毋爲戎首曰炎劉不起布衣
李趙曹馬不繇將相乎防之曷可勝防也鋼之曷
可勝鋼也酌盈虛定經制安本支以安黔首惟時

變是適若朽索春冰之稟視匹夫皆予勝也寧惟
是二三宗室

濟大事者必順人情乎天下所共好與好之天下所
共惡與惡之庶政之張弛人材之舉錯皆與天下
爲公而不以已私則天下服矣繼治者道同繼亂
者道異自朝廷達於郡縣其揆一焉未有以亂易
亂而能服人心者也心之不服烏能箝天下口

民俗之奢也偕儉則陋士習之和也靡直則激抹偕
之敝多陋抹陋以禮抹靡之敝多激抹激以中惡
其陋而奢是尚惡其激而靡是求是猶懼江河之

不東欲揚波而助其瀾也世道安所底止

兩能則爭兩軋則鳴兩合則成此予夢中語也寤而覺有至理輒書諸紳以戒褊心

百里之中有堅城一區寇至民趨入保遠趨不過五
十里則虔劉抄掠之患免矣五百里之中有銳卒
一旅寇至兵出援擊遠援不過二百五十里則攻
城拔邑之患免矣城所以爲守兵所以待賊遠偵
謀明分聚審幾而動毋先自擾此周閭衛民之善
策也守得戰乃堅戰得守乃逸戰守得食乃久若
聯民志化內奸其尤要矣

朋友之責善匪徒以口舌勝也蓋反躬淬礪積誠感
孚者豫焉無諸已而求諸人耻也悃真薄而口說
是勝欺也好面數以沽直不顧其安妄也故忠告
善道聖賢所貴不可則止一剛憤自愛者能之矣
夫臣於君亦然能爲諍友則可爲諍臣也

聽言之道與進言者異彼非良士也非名譽人也一
且語我以隨夷之行舜禹之德曰是忠愛我而以
賢聖望我也其人未必善無暇計也我無大過也
無訾毀可指也一旦加我以莊跖之規幽厲桓靈
之喻曰是忠愛我而懼我或納於邪安知我不如

其言也其人是有惡無暇計也故江海以善下爲
百谷王聖人以廣茹爲萬善主攻玉以石石不美
於玉也鍛金以炭炭不精於金也礪刃以砥砥不
銛於刃也

以事練心萬感不搖其慮則心定矣以事練識萬變
不惑其鑒則識明矣以事練才萬應不窘其施則
才裕矣所貴乎人者謂其聰明睿智能代天工治
萬事也惟大聖人能心與天符機與神合大賢而
下必繇思習思之通也有敏遲習之得也有利鈍
蓋什一千百殊焉性所同也才所獨也禹益之平

成伊呂之征伐姬公之經制藉使臯夔傳召當之未必能匹光儼盛也

穆穆言乎其深潛也翼翼言乎其齋戒也亶亶言乎其常覺也勉勉言乎其常運也天命不已故四序代行二曜久照聖心不已故倫物各盡綱紀常秩大哉心乎聖人所以合性命而成變化也歛之一掬而包括三才握之無形而出入千古非天下之至神其孰能與於此

清虛上覆時象不奕謂天神乎調陽燮陰誰其尸之重厚下載品物咸亨謂地神乎奠山翕河誰其宰

之有無不測殃祥惟降謂鬼神神乎惠吉逆凶誰其操之故人於天地稱三才心於乾坤稱三極其精力智慧誠足以叅之也妙萬物者惟神極神妙者惟心極心之神者惟聖極聖之神者惟誠誠者心之本體天地鬼神之樞也誠無形而無不形誠無聲而無不聲至虛而實至變而貞渾淪無着純粹以精以其不可得而名故強名之曰誠

神者性之靈覺也誠者神之主宰也神變動馳騖感應萬端惟誠則萬神受職其思睿其視明其聽聰其貌恭言從其極至雨暘寒燠時百嘉屯遂四海

和平不誠則神明化爲魑魅曰狂曰僭曰豫曰急
曰蒙其極至而賜寒煥失序賢人隱閉寇賊暴興
夫人之神與天地之神一氣也誠一理也故天人
貞勝志氣交動

易有太極中之謂也陰陽無端剛柔無際仁義無迹
寂焉其若虛混焉其若蒙湛焉其若洗自其四畔
無着謂之中自其一理渾具謂之誠言中空寂者
猶託似焉言誠則至空而至實寓也至寂而至變
存也

君子之學莫先於定其心定其心在知所止心得所

止而後應物各得其止也以心之止應物以物之止處物於物無所加損吾心亦無加損故心一而已無寂感無內外無大小無常變將六師定九域歌雍舞勺以綏太平與督二三耕奴秉耒南畝一也爵賞在前刀鋸在後與疏水而終牖下一也心止則一一則可以貫萬不止則二則三其究以心化物至憧憧百端雖智慧能燭幾微敏捷足批紛糾視明覺自然者天淵矣故忘物之心乃可以御物徇物之心祇足以喪心

周言主靜本知止乎程言主敬本戒懼乎白沙濂溪

之遺緒也良知性善之注腳也心一而已心一則性一性一則教一止則未發之中也中卽性也孔曾思孟其言一也末學自分師門抗旌而立異擊建鼓而爭是非何其陋耶詩咏敬止書曰欽止惟敬則止惟敬則中惟敬則自見天性若以枯寂厭物之心而求靜以虛驕凌世之念而言良知其不爲居簡而自恣任氣而滅理者幾希去聖教千里去天命萬里

君子之學其法天地乎戴圓履方適皇王極終古吾以一身爲作對爲主宰其中瑩乎纖塵弗能染也

魏乎萬物弗能干也其識趣宏以卓矣自家庭唯
諾行寢影衾以至辭受進退毀譽患難鉅細必謹
惕乎執玉將墜也業業乎千均之弗勝也其操履
謙以約矣易曰智崇禮卑崇效天卑法地智也者
君子之所實見也禮也者君子之所實履也

人皆求得於口耳吾獨求得於心人皆求得於奇僻
吾獨求得於易簡凡求得奇僻者皆爲口耳計也
誠欲自求於心則舍易簡何之焉中庸言致曲言
明誠自慎獨極之無聲無臭至易而至神至簡而
至妙吾方體驗省察之不暇何暇緒七十二藏摘

一二近似語以簧舌炫衆乎哉易曰默而成之不
言而信存乎德行德也者自得於心不可以告人
欲告人而難乎其爲言者也

金木水土之相尅也剛制柔也水火金之相尅柔制
剛也水有質而無骨以土爲骨火有氣而無質以
木爲質然炎上趨下莫能易也金出於土而堅於
土木植於土而堅次金然從革曲直無定形也柔
者剛剛者柔乎土生金以自輝金生水以自麗母
子相養之義也水生木以自枯木生火以自滅火
生土以自灰父子相代之義也土得水而潤金得

木而利水得火而溫木得土而榮火得金而瑩祖
孫相報之義也水得土而有歸火得水而有止金
得火而能化木得金而成用土得木而著功君師
相成之義也土之剛不若金柔不若水然火煨之
而愈堅木漬之而益澤金木觸之而無損埃塊益
剛柔之得中乎其體靜其質重不流不醖不割不
華而流者饑者割者華者於此乎稟氣於此乎歸
根故有容者莫如土至壽者莫如土重靜爲君輕
躁爲臣之義也

國有聚斂之臣寧有盜臣蓋損上罪輕於損下益上

惡浮於損上聖賢爲萬世示戒至深切也今功令
盜邊餉至二百金殺無赦於盜臣用重典矣乃秉
均主計者位列公孤而悉搜海內庫藏以實內帑
侈豐亨使聖人御宇宜何以加法乎

溝遂畝畝截然井畫古之制地能如是齊一乎則稌
黍稻粱不當隨高下而播矣百畝二宅犁然井授
古之制民能如是均平乎則餘夫閑民不當有出
於八家之外矣古今地勢無變遷古今人情不甚
遠聖王所以經野授產亦因地之宜而不能強諸
地也亦導民之利而不能無遺民也均之使不至

偏擅限之使不能兼併則天下無苑財無窮人矣
然獨斷於草昧之時易矯枉於承平之後難嗟乎
漢唐宋之興未嘗無英辟柰何天斬王佐使帝王
一體萬物之政遂湮沒不復行也

夫學學所以仕也夫仕仕所以學也教化刑罰錢穀
甲兵一切簿書期會無非學者從簿書期會心無
弗盡事無弗當則曰下學心無一不與性合事無
一不與理合簿書期會卽性命神化也故曰下學
而上達不養交不要譽第盡吾心以默契上帝之
心故曰知我其天

君子之學必先信其心而後可以致用。繕性滌欲能無疵乎？禔躬砥行能爲儀乎？喜怒愛惡能勿乖秉？義乎？人情物態能周知乎？經常權變能合機乎？裁成輔相能各得宜乎？聖人命開仕開指其心曰：吾斯之未能信。是有志天德王道之全，不以權謀功利自小其見也。是遠慕唐虞三代之英，不以富強禮樂自局其材也。嗟乎！今學仕滿天下，吾安得若人與其談體用合一之學？